



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : f Tir Yimyim

Instagram tiryimyim@aolima

YouTube tir yimyim

TAPAK 8

Rajnath Singh leniba nung SCO  
Defence Minister tem senden amen

WIF tir Brij Bhushan Sharan Singh  
anema FIR benoktsü: Delhi Police



VOL. XX NO. 196 (ADOK 196) DIMAPUR KÜPTOKNÜ (SATURDAY) RONGCHII (APRIL) 29, 2023 ₹ 5.00

## IDAN-i Technology Transer Agreement agitep

Dimapur, April 28, 2023

(TYO): April 28, 2023 nü Investment & Development Authority of Nagaland (IDAN)-i Nagaland Tool Room and Training Centre (NTTC) aser Eco-Green tsüingda tenangzüktep ka nung sign sütepogo.

Iba ya Nagaland nung Investment and Entrepreneurship tajungba kümdaktsüta atema lir.

Iba mapatong ajanga yimdaklen alirtem taküm jenjang tajungba akümtsü ta IDAN Chairman Abu Mehta-i ashi.

Iba tenangzüktep nung rural entrepreneurship machines & equipment 10 tashi yanglutsüba technology transfer, training, aftersales aser market linkages

dena lir, ta pai ashi.

"NTTC ya tajungba melentsü aser State of the Art manufacturing support centre kümdaktsüta. Iba ajanga national and international entities, centres of excellence aser world class institutes den tesentaktep yutetsü" ta IDAN Chairman-i ashi.

Iba mapatong nung banana fibre products, pineapple fibre products, banana leaf tea cups, plates amala training agütsüta ta NTTC Principal-i ashi.

Sentong nung Eco-Green-ia Nagaland nung adokbatem Austria, US aser UK nung shishilembatsü indang metetdaktsü.

## NE states nung April 28-May 1 tashi tzünglu arutsü

Guwahati, April 28, 2023

(Agencies): Northeast India kübok tesem balala nung taruba anogo pezü tashi tzünglu arutsü ta India Meteorological Department (IMD) department-i metetdaktsüogo.

April 28 nungi May 1, 2023 tashi Northeast kübok tesem balala nung tzünglu arutsü, mopung tashi agi aontsü, tsüingmok atentsü aser tsüingi

aitsü ta IMD department-i ashi.

Hokolbar nungi Hombar tashi Arunachal Pradesh, Assam aser Meghalaya nung tzünglu arutsü. Ano, kasaji Honibar nungi Hombar tashi Nagaland, Manipur, Mizoram aser Tripura nunga ajurutsü, ta IMD-isa ashi.

IMD department-i anogo pezü atema Northeastern region nung 'yellow watch' osang metetdaktsüogo.

## Meghalaya nung COVID-19 ajanga nisung ka asü

Shillong, April 28, 2023

(Agencies): 2022 sülen tang mezüing atema Meghalaya nung COVID-19 agi nisung ka süogo ta Meghalaya health minister Ampareen Lyngdoh-i Hokolbarnü metetdaktsü.

West Garo Hills district nung COVID-19 puteta alir ka asüba sülen health department-i precautionary measures ajak inyaktsü lemtetogo, ta Health Minister Ampareen-i ashi.

"Nisungtemi kanga kümdangtsüla saka petsaprong masütsüla" ta laisa ayongzük.

Meghalaya nung nisung 17 dak Covid-19 puteta lir.

"Covid wara ama tensa majurutsü ajisüaka public-i

Covid-19 protocols sülen anidaktsü mepishir" ta Ampareen-isa ashi.

Health Department nung principal secretary Sampath Kumar aser secretary Ramkumar S na den Meghalaya nung COVID atema senden ka menogo ta laisa shisem.

"Shirang yimya alirtemi block levels ajak nung testing centres-i aotsüla. Tesem balala nung senzürtem kümdanga alitsü mepishir" ta Health Minister-isa metetdaktsü.

"Department-i Hombarnü chief minister den senden ka amentsü aser idangji vaccines dena COVID dak sendakba onüktem lemsateptsü" ta laisa ashi.

## AR-i NSCN-IM ket nungi civilian 6 kümzük

Dimapur, April 28, 2023

(Agencies): Assam Rifles-i Dimapur nung civilian 6 tashi NSCN-IM ket nungi kümzükogo. Parnok ya April 13 nungi 27, 2023 tsüingda apuba liasü.

Assam Rifles-i mapang shitak nung mapa inyakba ajanga NSCN-IM-i mapa tamajung inyakba noktangtetogo.

Iba mapang AR sepaitemi NSCN-IM züingsem pungu- Lt Khenito Assumi (Chekiye village, Chumukedima), 2nd Lt Neison (Kangpokpi, Manipur), Lance Cpl Mughahuto, (Suruhoto,

Zunheboto), Sgt Chonpenthung Murry, (Wokha village) aser Sgt Katoho Yeptho, (3rd Mile, Dimapur) nungertem apu.

Assam Rifles sepaitemi Bamanpukhri nung ki ka nungi civilian tem kümzük. Iba tesem nungi NSCN-IM-i ozüing alema mapa inyakyonga aru.

AR sepaitemi kümzükertem- Mulutayo Kezo (April 25 nü apu), Akito Sumi (April 27 nü apu), Raju Gupta (April 21 nü apu), Raj Kumar Das (April 21 nü apu), Piyar Ali (April 13 nü apu) aser Huvito Sumi (April 27 nü apu).

## PM Modi-i Nagaland nung 100 W FM transmitters 2 lapoktsü



Hokolbarnü Prime Minister Narendra Modi-i online ajanga Mon nung FM transmitters lapoktsüba sentong nung Rajya Sabha MP S Phangnon Konyak adenba angur.

Dimapur, April 28, 2023

(TYO): Prime Minister Narendra Modi-i Hokolbarnü online ajanga Nagaland nung 100 W FM transmitters ana lapoktsüogo.

April 28, 2023 nü PM Modi-i linük kübok tesem balala nung FM transmitters 91 tashi lapoktsü aser iba nung Nagaland kübok Mon aser Tuensang dena liasü.

Mon district atema agiba sentong nung Rajya Sabha MP S Phangnon Konyak aden aser lai pelaba metetdaktsü.

"All India Radio (AIR)-i FM transmitters amenokba atema kanga pelar aser iba ya PM Modi indang alizüing lir, kechiyong pa dak meta talang pilar alirtem senzüka meyutsütsü tebilemba lir" ta Phangnon-i ashi.

"Tanü digital putu nung information ya tashitait hadir ka lir aser nisung ka iba ya medeni alitsü makok. Radio ya communication maparen jenjang dalangtiba lir aser osang tejangja angazüker" ta laisa ashi.

AIR Kohima programme executive Lemjan Phom-ia Prime

Minister dang Mon nung 100W FM transmitter lapoktsüba atema pelaba metetdaktsü.

Külen, Tuensang deputy commissioner Nokchasashi-ia Tuensang nung FM station ka lapokba ajanga nübertem kanga ajangzüktsü ta ashi.

FM station ajanga nübertem dangi programmes, education, health aser social issues osang prokshitsü aser iba ajanga temelenshi tulu bener arutsü, ta DC Nokchasashi-isa ashi.

DDG (E)/Cluster Head K.K Rengma-ia AIR Mon nung retired Staff dang pelaba metetdaktsü. "Parnoki mapang agütsüba ajanga iba mapa takok angur aser Mon nung alirtemi iba medium ajanga shilem agitsü mepishir" ta Rengma-ia ashi.

Hokolbarnü state 18 aser union territory 2 nung PM Modi-i district 85 nung FM transmitters 91 lapoktsü. "India nung tashitait kümdi ta süra India senso shinga maangka mengui melidaktsütsü" ta PM Modi-i ashi.

"FM transmitters 91 lapokba

ajanga sorkar policy tem indang osang prokshitsü. Yimtsüingtem nung modern technology agütsütsüla aser optical fiber enokba den jenjang dalang agi data agütsüba ajanga information angur" ta paisa ashi.

Iba ajanga yimtsüingtem nung digital entrepreneurship mapa tenzükogo. Ano UPI ajanga small businesses aser street vendors nem banking services agütsüogo, ta PM Modi-isa metetdaktsü.

"Ozü putu nung radio den tesentaktep tajung liasü aser ni radio nung host (Mann Ki Baat programme) ama inyakba ajanga tepela angur. Linük nung sensotem den sendaktepba ya radio ajanga dang takok angur" ta paisa metetdaktsü.

PM Modi indang 'Mann Ki Baat' ya April 30, 2023 nü 100 buba edition ajungtsü.

Iba radio sentong ya October 3, 2014 nü Vijayadashami benjung nung tenzük aser Indian languages 22, dialects 29 aser international languages 11 ajanga prokshir.

## Nagaland nung oil palm tsünüba asentenshitsu



Dimapur, April 28, 2023

(TYO): Agriculture department-i Nagaland nung oil palm tsünüba maparen asentenshitsu kechiyong state sorkari telok ana den tesentaktep yangluogo Agriculture Advisor Mathung Yanthan-i ashi.

Taküm küm tetenzüklen state sorkari Godrej Agrovet Limited (GAVL) aser Patanjali Foods

Limited den Memorandum of Understanding (MoU) nung sign sütepogo aser iba ya oil palm cultivation renloktsü aser area expansion atema lir ta Advisor Mathung-i ashi.

Iba ya National Mission on Edible Oils-Oil Palm (NMEOP) kübok lir, ta paisa ashi.

Hokolbarnü Department of Agriculture-i anogo ka state level

workshop cum awareness programme ka ayonga agi. Iba sentong ya Agri Expo, 4th mile nung agia liasü.

"Iba mission yagi temelenshi bener arutsü aser state rongsenketzüing tajungba akümba dang masü saka mapa adoktsü" ta Mathung-i metetdaktsü.

Nodal department-i aluyimertem yaritsü atema tongti shilem lir anungji department ketdangsurtemi pei tajungtiba agi aluyimertem ajungmesotsü aser yaritsü ayongzük, ta paisa ashi.

Nagaland nung oil palm tsünüba maparen inyaktsü lenmang sadema lir anungji aseneoki meranga inyaktsü nungdaker. State sorkari price aser regulatory act atema policy support agütsütsü, ta Agriculture Advisor-isa ashi.



## Kohima nung State Level Parliamentary Quiz Competition ali



ATI Kohima nung April 28, 2023 nü State Level Parliamentary Quiz Competition aliba mapang Commissioner & Secretary, Youth Resources & Sports, Parliamentary Affairs, Wezope Kenye-i kaketshir den jembidang tangokba noksa nung angur.

**Dimapur, Rongchii/April 28 (TYO):** State Level Parliamentary Quiz Competition sentong ka Department of Parliamentary Affairs, Government of Nagaland ajanga April 28, 2023 nü Administrative Training Institute (ATI) indang Imagine Hall nung ayongzüka liasü.

Iba sentong nung tesemdanger tongti ka ama Commissioner & Secretary, Youth Resources & Sports, Parliamentary Affairs, Wezope Kenye, IAS ajanga jembidang, lanur tekolok shisatsü tajung benjongsü aser parnoki shisatsü angutsü tzüraba, metetnüba, angazüknüba aser kaketshir temi ideas tasen meteta angazüksü tejangraba aliba mechi iba tetoktepba ya ayongzüük.

Iba tetoktepba ya ajanga shisatsü ya tatalokba tem tekolok nung ayoba kisung masü saka tuluba angatetsü asoshi kasa akumer ta sayur, ta Kenye-i ashi.

Iba tetoktepba ya asüngdangba tem shidak langzüba kisung masü saka kanga kumdanga bilemdangba,

asadangba, osangtsüsang angatetba aser asangsang nung amshiba sayutsü asoshi lir, ta pai ashi.

Kenye-i shilem agirtem dang tetoktepba ya tayongzüka ka ama masü saka angazüka aintsü asoshi maangka ka ama agitsü ajungshia liasü.

Paisa kaketshirtem dang iba sapang nung tajangzüük bushia pei sempet sayutsü aser yimya tasen angazüksü ajungshia liasü.

Kenye-i iba tetoktepba sentong takok ngua ayongzüktetba atema shilem agir, tesayur aser tayonger ajunga dang pelaba lemsatapa liasü. Nagaland nungi kaketshirtem iba amala sentong nung shilem agitsü asoshi ajungmesoa department-i maneni iba amala sentong ayongzüksü, ta pai ashi.

Iba tetoktepba nung district 13 nungi kaketshir temi shilem agia liasü, kong district tasentem - Chümoukedima, Niuland, Tseminyu - nungia tang mezüngbuba shilem agia liasü.

State Level Parliamentary Quiz Competition nung Dimapur district-i mezüngbuba jenjang

ngutet, iba sülen Kiphire district ajanga tanabuba jenjang, Longleng district ajanga tasembuba jenjang aser Mokokchung district ajanga pezübuba jenjang nguteta liasü.

Iba tetoktepba nung takok angur nem senpet mezüngbuba jenjang angur nem sen 20,000, tanabuba jenjang angur nem sen 15,000, tasembuba jenjang angur nem sen 10,000 aser pezübuba jenjang angur nem sen 5,000 agüja liasü.

Iba tetoktepba ya Nagaland nung Government aser Private school tem nungi kaketshir 270 dak tema adenshia repranga liasü.

Sentong nung Assistant Professor, Dr. Eunice Alinger, Kohima College, Kohima ajanga tarur pela agizükba o jembi aser Mewelo Kepfoh, Junior Section Officer, Parliamentary Affairs, Government of Nagaland ajanga melepzüing o jembia liasü.

Tetoktepba nung tayonger ya Assistant Professor Dr. Evothung Ezung, Kohima College, Kohima liasü, aser Wasenya Magh & Meshach Semy nati temeja ken ka aten.

## Jai Bharat Satyagraha sentong tembangogo



**Dimapur, Rongchii/April 28 (TYO):** Nagaland Pradesh Congress Committee tawabangba kübok state tesem ajungalen Jai Bharat Satyagraha ayongzüka agiba Hokulbarnü Congress Bhavan, Kohima nung tembanga liasü.

Modi sorkari democracy anema sentongtem yangluba, Congress lenir Rahul Gandhi parliament züngsem nungi agienba anema aser Adani

Group ajanga ashikülak mapa inyak ta tai tonglokja aliba ken o Supreme Court-i anir mesüra Chief Justice of India-i anepalua Joint Parliamentary Committee kati bushisüngdangtsü khanga Jai Bharat Satyagraha ya ayongzüka liasü.

Jai Bharat Satyagraha tembangba sentong nung jembidang taoba NPCC tir K.Therie-i ashiba agi, pei bilemba lemsatetpa temeden

amokbangogo.

Sorkar machinery ajungai Adani kumzüksü atema inyaker, democracy laogo, ta pai ashi.

BJP sorkar indang Fascism, nisung ka kijai tashi ajak amshitsü merangba ajaki aitsütsüla. Democracy kumzüksü asoshi Satyagraha nungdaker, kechiaser centre nung aliba sorkari democracy tashi meiti kumdaktsütsü meranger, ta pai ashi.

## Peren nung World Immunization Week mungogo

**Dimapur, Rongchii/April 28 (TYO):** MOMENTUM Routine Immunization Transformation and Equity (M-RITE) Project, Indian Social Responsibility Network (ISRN) ajanga 'The Big Catch-up' ome nung ajemdaker World Immunization Week 2023 ayongzüka liasü aser Peren district kübok Ramzie School, Jalukie nung April 27, 2023 nü munga liasü.

Dr. Michael Tetseo, MO, CHC. Jalukie ajanga sentong nung immunization indang jembidang vaccine nung temolung agütsütsü ashi aser anema alitsü asoshi asen dak nungi tenzüksüla, ta ashi.

Medical department ajanga maparen balala inyakba indang awareness agütsüba ambassador ka-ka asütsü pai kaketshirtem ajungmesoa liasü. Vaccine ajanga nokdangtsü

akokba tashidak nungi nüburtem kumzüksü asoshi ajak lungjemer inyaksü mapatem metetdaksütsü nükjidong nung World Immunization Week amunger, ta pai ashi.

Iba sentong nung "The role of vaccines in preventing diseases" onük nung ajemdaker speech competition ka agia liasü, kong Keyisabeule, Nsanglungle aser Peniel nungeri mezüngbuba, tanabuba aser tasembuba jenjang ngua liasü. Iba tetoktepba nung takok angur nem kulizüing kaket den sempet agüja liasü.

Iba sentong nung menden Haipeurangbe Moses, ORW, Peren liasü, Ville Rhetso, District Coordinator ajanga metetpelaba mapang agi, Rachel ajanga temeja ken ka aten aser Kehelingle Ramlila, Administrator, Ramzie School ajanga o tatsüka jembia liasü.

## Fazl Ali College nung sobaliba anogomung amung



**Dimapur, Rongchii/April 28 (TYO):** Cultural Club aser FACSU ajanga Fazl Ali College, Mokokchung nung April 28, 2023 nü Fazlian Cultural Mosaic sentong ka ayongzüka liasü.

State balala nungi aruba kaketshir aika asoshi college ya ki tanabuba lir. Iba ama environment ka nung sobaliba aser yimsü balala meyoktepa lir. Item sobaliba tabu balala benjongsü atema College ajanga küm shia sobaliba sentong ayongzüker, kong kaketshir temi pei indang

sobaliba ayak sayur aser ano dangar kaketshir indang sobaliba angazüker.

Sentong nung Fazl Ali College indang principal ajanga kati ka indang sobaliba akumtsübotsü aser meimtsü ajungshia liasü.

Tejatseizo, Asst. Prof., Dept. of History ajanga tourism, globalization amala nung maangka aliba indang kaketshir den lemsatetp aser itemji meteta alitsü ayongzüka liasü. Iba sentong Jubilee Students' Union nungia shilem agia liasü.

## Vitsutho Nyuthe-i Handloom Expo semzüksü



Vitsutho Nyuthe, Managing Director, NHHDC Ltd., Dimapur ajanga April 28, 2023 nü Handloom Exhibition lapoktsüba sentong nung tangokba noksa nung angur.

**Dimapur, Rongchii/April 28 (TYO):** Nagaland Handloom & Handicrafts Development Corporation ajanga ayongzüka aser Office of the Development Commissioner (Handlooms), Ministry of Textiles, New Delhi ajanga sponsor asüba Handloom Exhibition sentong ka April 28, 2023 nü Vitsutho Nyuthe, Managing Director, NHHDC Ltd., Dimapur ajanga semzüksü. Iba Expo ya May 11, 2023 tashi alitsü.

Assam, Manipur aser Nagaland kübok district balala nungi iba sentong nung shilem agir, kong ola-angla amshia yangluba osettem sayur.

Iba Exhibition nükjidong ya domestic aser export market nung marketing channel tem yangludaktsütsü aser ajungkettsü aser tesendaktep bener arutsütsü asoshi lir.

Ibai handicraft yanglurtem asoshi parnoki yangluba osettem ayoktsü atema maangka ka amai lir.



# PM Modi-i anogo ananü Karnataka state nung nüboyimtsü

**New Delhi, April 28 (Agencies):** Ato kilonser, Narendra Modi-i Honibar aser Amongnü Karnataka state semdangtsü aser iba mapang nungji pai BJP atema nüboyimtsü.

Karnataka nung pai lokti senden trok nung jembitsü aser roadshow ana agitsü.

Honibarnep Modi tayimtsü ka nung Delhi nungi apusotsü aser Karnataka nung Bidar airport atongba sülen pa helicopter ka nung Humnabad-i aotsü aser anüingdang 11:00 ako nung lokti senden ka nung jembitsü.

Iba senden tembangba sülen pa Vijayapura-i aotsü aser nikongdang 1:00 ako nung lokti senden ka nung jembiba sülen Belagavi district kübok Kudachi-i aotsü aser nikongdang 2.45 ako nung lokti senden ka nung jembitsü.

Iba sülen Modi Bengaluru-i aotsü aser Bengaluru North nung road show ka nung shilem agitsü. Bengaluru nung pa aonung ayiptsü aser Amongnü anepdang pa Kolar-i aoba sülen anüingdang 11.30 ako nung lokti senden ka nung jembitsü.

Kolar nungi pa Ramanagara district kübok Channapatna-i oa yangji nikongdang 1:30 nung lokti senden ka nung jembitsü. Nikongdang 3:45 nung Hasan district kübok Belur nung pai lokti senden ka nung jembitsü.

Iba sülen pa Mysuru-i aotsü aser roadshow ayongzuka agiba sülen pa Mysuru nungi tayimtsü ka nung Delhi-i meyipa aotsü.

May 10 nü Karnataka nung assembly election agitsü lia taküm February ita nungi tenzuka Modi-i tang agi tekubenbuba Karnataka semdangser.



April 28, 2023 nü New Delhi nung JD(U) lenir, Ajay Alok-i (abelen) BJP nung adenba sülen tangokba noksa nung angur. Kasa noksa nung Union Minister Ashwini Vaishnaw-a angur.

# SC-i tesempa o jembirtem anema ken o benoktsü tuyur

**New Delhi, Rongchii/April 28 (Agencies):** Hokolbarnü Supreme Court (SC)-i states aser Union Territories ajak dang tesempa o jembirtem anema complaint magütsüyonga parnok anema ken o benokang, ta tuyuogo.

Justices- KM Joseph aser BV Nagarathna nati akümba bench-i, tesempa otemji ajanga linük nung secular jenjang raksatsütsü aser iba ya ozüing alema inyakba aibelen tuluka lir, ta metetdaksü.

Bench-isa, 2022 küm October 21 nü agütsüba obendangi tamangba yimsü kecha mebendangi benoktsüla aser tesempa o jembirtem anema ken o benoktsü menora ibaji court mezüingmeshiba ama züingshitsü, ta tekümdangtsü metetdaksü.

Supreme Court-i, "Tamangba yimsü tenüing nung asenoki kechi jenjang tonger? Asenoki yimsü jenjang ajema kümdaktsüogo, iba ya tejashitsüka lir," ta metetdaksü.

Supreme Court-isa Uttar Pradesh, Delhi aser Uttarakhhand state tem dang tesempa o jembirtem anema

tekaraba nung inyaktsü tuyu. India linük temzüing kübok India ya secular linük ka lir, ta shia SC-i Uttar Pradesh, Uttarakhhand aser Delhi sorkartem dang aibelenertem anema complaint matai tekaraba nung parnok anema ken o benokang, ta tuyu.

Hokolbarnü bench-i, "Obendangertem ya yimtenren den sendaktepa mali aser Party A mesüra Party B atema mebilemstür, ajisüaka India temzüing temelung nung yur inyaker," ta ashi.

Supreme Court-isa, tesempa o jembirtem anema menoa ken o mebenokra ibaji court mezüingmeshiba ama züingshitsü, ta metetdaksü.

Journalist Shaheen Abdullah-i Supreme Court dang, tesempa o jembirtem anema ken o benoktsü atema Delhi, Uttar Pradesh aser Uttarakhhand state tem dang tuyutsüla, ta mepishiba ken o angadanga mapang nung court-i item oshidang agütsü.

Abdullah-isa SC dang 2022 küm October 21 nü obendangi state aser union territories ajak nung benoktsüla, ta mepishia liasü.

# Rajnath Singh leniba nung SCO Defence Minister tem senden amen



April 28, 2023 nü New Delhi nung Shanghai Cooperation Organisation (SCO) züingsem linüktem nungi Defence Minister tem senden nung Defence Minister Rajnath Singh (tiyong), Director of SCO Regional Anti-Terrorist Structure (RATS) Mirzaev Ruslan Erkinovich (abelen nungi tanabuba), China Defence Minister General Li Shangfu (abelen), Russia Defence Minister Sergei Shoigu (ajichilen nungi tanabuba) aser Tajikistan Defence Minister, Colonel General Sherali Mirzo (ajichi) nunger tangokba noksa nung angur.

**New Delhi, April 28 (Agencies):** Hokolbarnü New Delhi nung India Defence Minister, Rajnath Singh mendenbuba ser Shanghai Cooperation Organisation (SCO) züingsem linüktem nungi Defence Minister tem senden amen.

Iba senden nung jembidang Rajnath-i, "Asenok tsüingda sobaliba aser civilisation tesendaktep lir. Putu aika asen nüburttem tsüingda tesendaktep liasü aser nüngdakba osettem nung amalitep liasü, aser tangbo ibaji rongsenketzüing aser sobaliba tsütsü tesendaktep kümogo. Putu mapang melenshiba den külemi asenoki item tesendaktep tashi itshitsü atema inyaktsü. SCO ya tashitait regional

organisation ka kümogo," ta ashi.

Rajnath-i okila jembiba sülen China defence minister General Li Shangfu aser Russia Defence Minister Sergei Shoigu natia jembia liasü.

Kasa senden nungji Uzbekistan aser Kyrgyzstan na nungi defence minister tema aden.

Brihostibarnü India-i China dang, anüdoklen Ladakh nungi sepaitem mainshira linük ana tsüingda lenla balala nung tesendaktep terenlok malitsü, ta metetdaksüogo.

Pakistan-ia SCO defence minister tem senden nung adentsü telemtetba agia liasü saka parnoki video conferencing ajanga dang iba senden nung aden.

SCO defence minister tem senden nung tongtibangsüa Afghanistan tensa densema regional security tensa atema jembitsü, ta osang ka ajanga metetdakja liasü.

Kiralongra anema longjemer raratsü atema SCO züingsem linüktem tsüingda amaliteptsü atema iba senden nung jembitsü.

SCO ya 2001 küm Shanghai nung tentetba intergovernmental organization ka lir. SCO nung züingsem linüktemji Kazakhstan, China, Kyrgyzstan, Pakistan, Russia, Tajikistan, Uzbekistan aser India lir. SCO nung observer linük anaji Belarus aser Iran na lir.

2017 küm India aser Pakistan nata SCO nung permanent züingsem aküm.

# Sudan nungi ano India nunger 362 anir aruogo



April 28, 2023 nü Sudan linük nungi India nunger Ahmedabad tonga anir aruba sülen tangokba noksa nung angur. Sudan nung tensa tamajungba akümba sülen India-i Operation Kaveri kübok sensotem anir arur.

**Jeddah, April 28 (Agencies):** Hokolbarnü Sudan linük nungi aniteta Jeddah (Saudi Arabia)-i anir oa aliba India nunger 362 tayimtsü ka ajanga Bengaluru tonga anir aruogo.

Minister of State for External Affairs, V Muraleedharan-i twitter ajanga, "Sudan nungi anitetba India nunger 362 Jeddah nungi tayimtsü ajanga Bengaluru-i apusoba atema pelar. Parnok aika Hakki Pikki kin nungi lir," ta metetdaksü.

Ano külen India nunger 392

Jeddah yimti nungi Indian Air Force (IAF) indang C17 Globemaster tayimtsü ajanga Delhi-i anir aruogo.

Minister of State-i ashiba agi, India nunger 135 Port Sudan nungi IAF tayimtsü ka ajanga Jeddah-i anir oa liasü, iba jakdang India nunger 326 INS Tarkash rong ajanga Port Sudan nungi Jeddah-i anir oa liasü.

Tang Sudan nung army aser Rapid Support Forces (RSF) sepai tsüingda rara adoka lir. Parnoki rara anena atatsü melungba sülen Hokolbarnü

India nunger 135 Jeddah-i anir ao.

Brihostibar aonung 10:00 ako nung ceasefire tembangtsü liasü ajisüaka Saudi Arabia aser United States-i mepishiba nung ajemdaker Sudan army-i sangdong ka ajanga, parnoki ano ghonda 72 rara anena atatsü lemtetogo, ta metetdaksü.

US, Saudi Arabia, Norway, United Kingdom aser United Arab Emirates densema aliba telok anati mepishiba nung ajemdaker Rapid Support Forces-ia ceasefire atsülangtsü melunga liasü.





## TIR YIMYIM YIMOBILEM (EDITORIAL)

DIMAPUR

KÜPTOKNÜ

RONGCHII 29, 2023


### Ali kiburtem aser yimten tashi

**A** tangji, alima yabo asenoki meyanglu saka Tsüngremi asenok atema yanglutsü nungji asenok meyong, ibayongji tesem tesem nung pei nüksüng dak yim kümteta yangji asenok kibur kümer alir. Alima tesem balala nung item ali kiburtem rongnung kibur kümjila akümeritemji asenok Naga nungertem ya asütsü. Iba jagi tangalenbo ali madak kiburji government saka asen lima nungbo ali madak kiburtemji nübortem lir, anungji government ali nungdakba mapang nübortem dang nungi alir aser temelaba agitsüsa akümer. Iba ama ali dak aketba senmangtsü mang aser sobaliba meteta Nagaland nung alir Naga nungertem asoshi kasa sobaliba aser temetentemji wazüka yutsütsü atema, Nagaland state kümli India temzüng arla 371 A nung Naga nung tamangba yimsü, lokti sobaliba, temzüng ozüng, yimten yimsüsübaren aser ali madak kibur akümba temeten ajak kata mezüdoki tongmelang agi saka tabensa nung lateta yuja kar. Joko, India tatar hoho nung temzüng küma latettsüogo, anungji asen tamangba yimsü, asen sobaliba aser asen meyong ali madak kibur akümba temetentem ajakji tangar nem mamokbangdaksüi asenok tang aser teti ajangzüksüsa mapa küma amshitsübaji asen dak dang keta lir. Asenok Nagaland nung municipal aser town council election aginüseta magitetbajia, talisa, tetsürtem nem menden balaka shiteta meyutsünüba agi masü saka ali dak aketba ken o ashishitepba ajanga magitetsüsa kümer, tangbo Municipal temzüng ozüng dena maka kümogo. Ibaji Municipal aser town council kümteta aliba tesemtem nung alir kibongtemji government li nung temelaba (patta) agütsür alirtem masü saka patta liaka pei li nung alirtem asüba agi lir, anungji Nagaland nungbo tangar yimtem nung ama municipal aser town council-i ali madak tashi amshitsü makoker. Atangji, yimten inyakyim küboki aittsü atema Nagaland nunga municipal aser town council kübok alirtembo government nungi ali patta meshia yua alitsüa akok, kechiyong pei lia ta asütsü atema tezüluba nung kuli kabosa nungdaker aser akhi tsüraburtemi itemji amshia maru. Ajisüaka, pei kiojen yangluba maparen ajak nung municipal aser town council dang asüngdangtsü aser alimelen agütsürang inyatsübaji ali kiburtemi memulunger. Iba tsüngdaji ali kiburtem o government na tangatettep ka nungdaker. Atangji, aliji government li-a ta mashir saka pei li nung asüyonga pei yanglunütsü yanglura, ashiko aji agi kidang kiyongertem dena lendong ajurutsüa akok. Aji dang masü yimti yimdong sademsadema topur junga yanglutsü atema ali kiburtemi kenyonji ali tilakata maitsütsü ta nokdak nungbo yimti nungji terenlok mapa mienyaktetsü. Iba ama tensa tia ajurudang government-i tashi amshitetsüsa "land acquisition act" takang aser tapet alitsü nungdaker, ibaji atema government-i temulung agütsü tenzüka osang angashia pelar. Aji oda, pei lima aser nübortem asoshi nungdak mapa inyaksü asoshibo government-i ali kibur nem alimenok dalang agütsür inyaktetsüsa government ket nung tashi alitsüla. Tangarbo government-i agia aliba li atsünga agirtem kiojen bendokja inyakba angur saka asenokbo ali kibur kati yimkong jajatsü lenmang nung dena gari mesenzüdaksüi nokdang. Item ama timtem aika asenokia ajangshir asünungji, tangbo shir li südir süang government nungdakba mapangbo alimenok dalang agütsür inyaktetsüsa ozüng aser ozüng amshitetba government nungdaker. Atangji, asenoka asenok dak alang kodang Municipal aser Town Council temzüng ozüng lateta kümtetdir, idangji tangar amai inyakdi asünungbo, Municipal aser Town Council shia kübok state government kübok department balala aliba ama, lenmang repranger, tzü tajemtsü anepalur, light repranger aser yimti merükmejuba departemtem alitsü. Item ajakji center government-i agütsüba kija agibo meperitsü, anungji asenoka sarubosa agütsütsü. Ajisüaka, Nagaland nung Municipal tuluba, Dimapur ama nunga terenlok mapa inyaktetsüsa chikhujungu saru agütsür Corporate aser company maliba agi inyaktertem nem dena ita sena magütsütet kangshir. Iba tensa tia ya bilemdanga, Nagaland atemabo ali kiburtemia municipal aser town council nem teyari agütsütetsüsa aser government-ia ali kiburtem madak tashi amshitetsüsa asenok dak apet temzüng balaka ka nungdaker. Iba amaji ka mesüra, India nung tangar Municipal aser town council inyakyim ajizükabo moutetsü. Tajungtibajibo, Naga yimten tebilemetsü otsü ya tatem küma lateter, India telongjem küboksa asüyonga Nagaland asoshi temzüng ozüng balaka laleta ao nung dang, asenoki tang ajuruba terata, timtem aser takoksa tia ya majurula.

## OLEMSABANG

### Tetsür ita shilem ao anentsü mapang temang anepaluyim kar

Internet Source - Prevention



Tetsür teimbaka (90%) kodang arishi küm 45 jungdir idangji ita shilem anentsü tenzüker, saka karbo arishi küm 40 nunga tenzüksü akok. Ibaji taküm nung tetsür ajaki ajurutsüba mapang ka lir. Iba mapangji tetsür aika temang nung timtem ajurur saka timtemji nisung shia balala, anungji nisung shia anepaluba yimyaji balala asütsü.

Aikati iba ama timtemji aakba agi doctor dang meshitetter, anungji ano talila timatemer, anungji akok tashi doctor ajurua kecha akmesen melii jembitsübaji mulungtettsüla. Ajisüaka tetsür shiaji treatment balala nungdaksüa akok.

Tetsür ka kodang ita shilem anentsü mapang tongdir, idangji temang nung ajungbena lemlama mapang tatsüka aittsü akok. Ibaji tekolak aser takong nungi tenzüksü. Iba dangji "Hot flashes" ta ajar. Iba timtemji talisa kechi achidang aser ajem dang mesüra kong alidang adoker, itemji putettsü merangang aser item chiyongtsütemji machitsü merangang, Teti alidak ki aser mapa inyakdak mekongmekonga yuang.

Kodang nü temangji lema aitdir, idangji tango meilongi talangka sashitsü merangang aser na temang tali tulu aser taret küma lira, ibaji ajemdakang.

Ita shilem anenba mapang kinüngbo den medem dang timmatemtsü atema (vaginal lubricant) K-Y Jelly mesüra Astroglide amshitsüla. Ano, anogo thia-thia Replens amshi nunga tajung asütsü.

Ano, amui junga moutetba timtem lira, mejangtsü anasa exercise tagi, chi tuluka techiyong, moko techi aser ano mejangtsü anasa coffee aser yi tejem. Kokra, mejangtsü anasa mamatsü talem jemang. Na mejangba takdangji tammang, temekong aser süngjemsüngjema yuang aser iba takdangji mejangtsü atema dang amshiang. Anung dang temejang aser kasa mapang nung mejangtsü aser saksü yimya sübaang.

Ano, memeteti jakla yakyak ta adoktsüa akok, anungji iba ama mepelai aitba jakla nungi jenbua alitsü atema mapa aikabo meinyaktsüla aser teti tajung tsütsü dang bilemetsü merangtsüla.

Ano, amatara boluba aser shisabolua aitba timtem lira, mapang peria agia mejangtsü, anisüngzüksü aser temang tashi ita alitsü merangang.

Iba ama ajaki ajuruba aser ajurutsüba timtem mapang ajurudang, külem medemer mesüra tantsü purtem den shisalemsatep ajanga teyari tuluka angutsü.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



# Nigeria nung Tenla ki rongdokyonga moapu nung tekülem agir



Nigeria nung Plateau State kübok aliba yimtsüng ka nung tamalen Tenla ki aliba kimong nung Khristantemi tekülem sentong agiba noksa nung angur.

**April 28, 2023:** 2021 aser 2022 küm Easter hopta nung North Central Nigeria kübok Plateau State nung aliba yimtsüng ka nung kiralongrartemi Tenla ki rongdoktsüyonga taküm Good Friday anogo nungi Khristantemi Tenla ki aliba kimong nungi adenshia tekülem sentong agi tenzükogo, ta International Christian Concern (ICC)-i metetdaksü.

Good Friday nü nisung 300 shi adenshi aser parnok teimbaka atem mesüra lung nung mener tekülem sentong nung aden. Karbo pei kidang nungi plastic chair bener arua amen.

Takümbo kiralongrartemi iba yimji mamak, ajisüaka Good Friday tekülem sentong nungi Khristantemi taoba mapang tatalokbatem bilemteta liasü.

Tekülem sentong tembangba sülen osangbener den jembidang Arogo nung lenir kati, "Fulani kiralongrartemi Tenla ki aser pastor ki densema

ki aika rongdakja liasü," ta metetdaksü.

2021 aser 2022 küm kiralongrartemi Tenla ki rongdoktsüba sülen ICC nung staff kati iba tesemji semdanga liasü. Tatalokba ka nungbo lisopur Fulani pastor ka tepseta liasü.

2021 küm kiralongrartemi iba yimdakji ki 500 dak tema rongdoktsü aser Khristan 2000 shi jenshia kilometer 35 pilar aliba Jos yimti nung jenok.

2022 küm nunga kiralongrartemi iba yim maneni amakdang ki aika rongdoktsüba den külemi alu nung aonsotsü raksatsü.

"Onoki takoksa tulu angu, ajisüaka onok Khristantem asüba agi sorkari yaritsü memelung," ta Arogo lenir kati metetdaksü.

Taküm Good Friday sentong nungi ICC nungi staff kata aden.

"Khenkhenbo onok tziunglu ajayonga tekülem sentong agir. Mapang ka nungbo ni

'pneumonia' agi shiranga liasü. Pastor-a hepatitis tashidak mena aser hospital nung amongba bill Naira sen 700,000 pai magütsütet ajisüaka medemertem aser par kinüngertemi senji agütsü," ta pai metetdaksü.

ICC den jembidang tetsür kati, kiralongrartemi anaben tashi yim amakba sülen Arogo nung züngsem kanga ajema aküm aser tenla-a ajema arur, ta metetdaksü.

Laisa, Tenla ki kilem aser yanglutsü atema onoki teyari nüngdaker aser pastor ki tasen yanglutsü nüngdaker, ta metetdaksü.

Tawa Plateau state nung kiralongrartemi Khristan nütsüng aika aliba yim 45 maakogo. Miango county nung parnoki Tenla ki 13 densema ki aika raksatsüogo. Kiralongrartemi aiben aonung ang yimtsüngtem amaker mesüra anüngdang Khristantem alui oa alidang yim amaker.

# Eritrea linük nung college azünger Khristan 100 dak tema puogo

**April 28, 2023:** Tan ita tetenzüklen Eritrea linük nung police-i college azünger Khristan telok ka mita aodang kaketshir aika apu; kaketshirtemji tekülem sentong agitsü atema adenshia liasü, ta International Christian Concern (ICC)-i metetdaksü.

Release International-i ashiba agi, linük yimtiba

Asmara nung police-i mita puoka lir aser jail nung puoka alirtemji junga mezüngshir.

Tang Eritrea linük nung Khristan 500 dak tema jail nung puoka lir; parnok anema court nung ken o mangadangi jail nung puoker.

Tawa kaketshirtem puokba Mai Serwa jail nungi nisung tali

Africa nung religious freedom anema inyakba sorkar tamajungtiba Eritrea sorkar lir.

Eritrea nung meimchir temeden anema kanga inyaker. Sorkari mapang shia tepuokdak alirtem chioker saka Khristantem aser tanga minorities bo mejungi züngshir.

# Papua nung yimjung atema Khristan lenirtem longjemer

**April 28, 2023:** Papua nung yimjung atema Catholic aser Protestant Khristan lenirtem longjemogo; parnoki Indonesia Tir, Joko Widodo dang rara adoka aliba province nung sepaitemi tashiyim amshiba nokdangang, ta mepishir.

April 26, 2023 nü Khristan lenirtemi osangbenertem den jembidang Jayapura nung tongti putir, Yanuaris Theofilus Matopai You-i, "Onoki civilian shinga mesüdaktsüner. Anungji onoki Indonesia Tir dang sepaitem

agientsü aser ken o jembi tenzüktsü mepishir," ta metetdaksü.

Papua nung sepaitemi tashiyim amshia mita ao tenzükba sülen tang mezüng Catholic Arogoi Protestant lenirtem den longjemer.

Arrshi küm 72 putir, You den tanga Khristan lenirtemji Evangelical Church in Indonesia nung Tir Rev. Dorman Wandikbo, Communion of Baptist Churches of West Papua nung Tir Rev. Socratez Sofyan

Yoman, Kingmi Synod chairman Rev. Tilas Mom, Indonesian Christian Church synod chairman Rev. Andrikus Mofu aser Papua Church Council nung moderator, Rev. Benny Giay nung liasü.

Advocacy group Imparsial-i ashiba agi, tang Papua nung sepai 16,900 shi lir.

2018 küm nungi tenzüka tesüiba küm pezü tsüngda iba rara nung nisung 242 süogo aser iba nungi civilian 177 densema lir, ta Amnesty International-i metetdaksü.

# ANOGO ABEN TSÜNGREM DEN

## Alima Rangpen Tenüngsang T.ken 103:1-12

"O Kü nela, Kibuba moajang" (t.1). Ken züluri kija takümi Tsüngrem ajaba o i ken lapok. Tsüngremi kechi inyak aser Paji shiba iba asoshi Pai Tsüngrem tenüng asang. Iba ken nung Tsüngremji tesüngmangtsü ta asenoki angutsü.

Paji taochi Kümtetdakba lir (t.8-12). Tsüngrem taochi agi asen dak malangba agütsür aser Pai aochi nung asen dak alangba Pai magütsür. Saka Pa temeshi ain adokba lir, aser asenoki metetta temenen menara asenoki Pa marütsütsüla.

Pa taochi Tebu lir (t. 13-18). Kechiba Tsüngremi taochi sayur? Kechiaser aria bilemtsü aser meimtsü Pa yimya lir. Pa temulungsentsü tanük lir kechiaser asenok ali agi yanglu ta Pai metet. Asenok tashi mait. Asenok naro ama ken dang alir aser yakta azülar aser asür.

Tsüngremi meimba asenoki agizükbaji asenoki Pa tenüng asangtsüla aser tashi angatsüla.

Alima rangpeni Pa tenüng asangtsü tetemsü (t.19-22). Jungkai Adokba kakat nung alima ajunga nung Pa tenüng asangba ayim sünga aoba angur.

Kechiba asenoki Pa tenüng asanger? Kechiaser Pa chuba menden kümzüka lir. Asenok Pa tenüng asanger kechiaser asenoki pa ozüngtem ayutsü akok, Pa tenzüker aser peladaktsür. Asenoki Pa tenüng asanger kechiaser Pa mapatem tesüngmangtsü, aser Pai idakji asenok shilem ka asütsü mela.

Ken ji tetenzükba O agi atem- kija jenjang nung. "Kibuba sangang, O kü nela." Ken züluri ashiba anidaka Tsüngrem tenüng sangang kechiaser Pa tesüngmangtsü tenüngtem lir.

# India nungi pastor aser kinüngtsü nati Norwich nung sayutsüngitsü



tezülen aliba Kuntinivasala yimlak lidar. Tenati children's home ka aser school ka lapoka lir.

April 30, May 21, May 28 aser June 25 anogotem nung Nicky aser Samuel nati Community Fellowship tekülem sentongtem nung sayutsüngitsü aser

**April 28, 2023:** Rev. Nicky Smith aser la kinüngbu Zion Samuel nati April aser June ita tsüngda Norwich semdangtsü aser Grace Christian Fellowship nung sayutsüngitsü.

Rev Nicky Smith ya Norwich nung aliba Grace Christian Fellowship nung küm 20 dak tema pastor inyaka liasü. La indang international ministry ka lir aser lai mapang shia UK, USA, Spain aser Holland nung aliba Arogotem nung sayutsüngir.

Nicky aser Samuel na tanur ana lir aser tang tena Andhra Pradesh state kübok kanga

tenati India nung inyakba mission mapa lemsateptsü.

Anogo ajakji Amongnü anogotem lir aser sentong ajakji Saints Event Venue, 217 Yarmouth Road, Norwich nung agitsü.

May 20 nü Nicky-isa 'The Spirit of Elijah / The End Times' seminar nung jembitsü. Iba seminar nungi Tejen Lai aser Tasen Lai naprongla nungi 'Elijah tanela' aroka shisadangtsü.

Seminarji shilem asem lemsar agitsü aser iba mapang nungi Sinai tenem nung Mosa nungi tenzüka tatembang anogo tashi ayimjemtsü.



**AO OSHI ANGAZÜKDAK:**  
**TANÜ ANGAZÜKTSÜBA OJANG**



Tir Yimyim

**Pupapuyim**

(adj) aoksaba agi bangka (lose of presence of mind due to shock)


\* Menoknok anakba mapang nübortem pupapuyima aküm.

**Puin**

(n) shisatsü tejangja bushiloka aienba (science)

\* Lanurtemi puin shisatsü bushiba nung temlung agütsüsüla.

**OLONG PAITEP # 6499**



**TIPIEN**

- 2. Súngjang adok - (5)
- 4. Mapa inyakdaksü - (5)
- 7. Nütsü tebuba - (3)
- 9. Ghonda metsür pezü - (5)
- 10. Tzü ayimdak - (5)
- 11. Mapang matongdang - (5)
- 13. Ghonda - (3)
- 14. Senyur - (5)
- 15. Lenmang tezülen - (5)

**LANGTSÜNGLEN**

- 1. Lenmang - (5)
- 3. Tetsü masü - (6)
- 5. Ajurunüa bilem - (6)
- 6. Obang ka aküm - (7)
- 8. Teburtem tsungda jatepba - (7)
- 9. Tzünglu tongdangba - (6)
- 10. Tarutsü mangdang - (6)
- 12. Akhidang indang - (5)

**OLONG PAITEP # 6498 TELANGZÜBA**

**TIPIEN :**

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tasen, 13. Lemjem,
- 15. Tambu, 16. Khuret, 17. Sang.

**LANGTSÜNGLEN :**


- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar, 11. Tatok,
- 12. Amang, 14. Jala.

**NAI-A YA METETTER MA**



Asenoki mera ka jajaa aoba mapang, asen temang nung aliba tashi 200 shi arakzür.

**Noksa nung meputepi aliba 10 bushiang**



Hokolbarnü Tripura Chief Minister Manik Saha aser tangartem Chief Minister's Annual Award for Academic Excellence to School Students-2022 sentong nung agiba noksa ka angur. State sorkari kaketshirtem state adena maotsü atema higher education nung maongka aika agütsür anungji kaketshirtemi classrooms nung tenoktenoka angatsüla aser tanga co-curricular activities nung shilem agütsüla ta CM Saha-i Rabindra Bhavan nung agiba sentong nung ayongzük. (Agartala, April 28)

**Assam nung küm 20 atema Chief Minister menden tazüing mali**

**Guwahati, April 28, 2023**

**(Agencies):** Assam nung taruba küm 20 atema Chief Minister indang menden tazüing mali ta Hokolbarnü Assam BJP Minister Pijush Hazarika-i ashi.

Guwahati nung aliba Assam Water Centre nung osangbener den jembidang 'Assam nung taruba küm 20 tashi Chief Minister nung amentsü tanga political party ka danga mali' ta pai ashi.

Congress Assam unit-i anir

political party 11-i 2024 Lok Sabha Elections nung BJP atsüngdoksü meranger saka iba ya kodanga mataloktsü, ta Minister Hazarika-isa metetdaksü.

Guwahati nung aliba Assam Water Centre nung osangbener den jembidang 'Assam nung taruba küm 20 tashi Chief Minister nung amentsü tanga political party ka danga mali' ta pai ashi.

Mapang kabo Congress tashi itta liasü saka tangbo tashimait kümogo, ta paisa shisem.

Akhil Gogoi, Lurinjyoti Gogoi aser Ajit Bhuyan nunger dak alaka opposition party 11 nungi lennir shinga memetet, ta Hazarika-isa metetdaksü.

Assam nung BJP-i taruba küm 20 tashi sorkar yimsü asütsü aser onok den tokteptsü atema opposition party tem tashi itshitsüla, ta paisa shisem.

**Manipur CM Biren-i Churachandpur district semdangtsü athi**

**Imphal, April 28, 2023**

**(Agencies):** Manipur chief minister N Biren Singh-i Churachandpur district semdangtsüba liasü saka tesem kar nung tensa majungba ajanga athi.

Manipur police-i tanü PT Sports Complex kima nung adenshirtem dak tenük amdaksüba tangola amshitsüsa aküm ta osang angazüker.

Churachandpur nung open

gym ka lapoktsüba lia yashi rongdoksü aser iba atema CM Biren-i "mejangjaba nisungtemi ibala mapa ya ajaklen inyaker" ta ashi.

Ajisüaka BJP sorkari ibala mapa inyakertem metoktsütsü aser aibelenertem merenshitsü, ta paisa ashi.

Iba tatalokba ya sorkar anema masü saka constituency sasep nung ken o ka lir ta CM Biren-isa ashi.

MLA 58-Churachandpur-i küm ka ajungben sentong ka ayongzüka liasü. Iba sentong shilem ka ama PT Sports Complex, New Lamka nung open gym ka lapoktsütsü atema Chief Minister jaok.

Ajisüaka nisung kari open gym raksatsü aser 58-Churachandpur MLA-i tatemtü kar ashi aser sentong tanaben agishitsü indang osang metetdaksüogo.

**ULFA (I) züingsem indang tasü mang Arunachal nung angu**

**Dibrugarh, April 28, 2023**

**(Agencies):** Myanmar nung aliba ULFA (I) tesep ka nungi jena aruba telungpur ka indang tasü mang nguogo.

ULFA (I) züingsem indang tasü mang ya Arunachal Pradesh kübok Tirap district nung Indo-Myanmar arrtsü anasa angu.

Sepaitemi Khonsa nung ongken ka nung tasü mang rema aliba angu ta osang angazüker.

ULFA (I) züingsem ya Palash Moran ta jangjaogo aser pa ya Tinsukia district kübok Tarani nunger liasü.

Moran-i 2021 küm ULFA (I) nung aden ta osang ajanga ashi.

Osang angazükba sülen Assam police den Palash tedi aser village headman nunger Palash Moran indang tasü mang alidaki ao. Idak nung jagi pa indang mang Tinsukia-i bener ao.

Myanmar nung ULFA-I

züingsem pezüi timtem ajuruba ajanga tesep toktsür jena aru ta osang ajanga ashir. Parnok ya Mintu Moran (Madan Assam), Palash Moran, Mahanta Baruah (Arindam Assam) aser Simanshu Bhuyan (Ranju Asom) nunger lir.

Par pezü rongnung nisung aseme Army tsüingdang temai adok aser Palash Moran ya dang mangu liasü ta osang ajanga metetdaksü.



Mizoram nung Aam Aadmi Party (AAP) lennirtemi osangbener den jembidang agiba noksa ka angur. AAP-i state assembly election nung shilem agütsü aser iba atema ochishir aser nisung tajung bushir ta Northeast AAP leader in charge Rajesh Sharma-i ashi. Züingsem 40 agi akümba Mizoram assembly election taküm küm tatemlen agütsü sentong lir. (Aizawl, April 28)



**GOVERNMENT OF NAGALAND  
DIRECTORATE OF ART AND CULTURE  
NAGALAND ; KOHIMA**

No. AC/PC/3/2020-21

Dated Kohima, the ..... April 2023.

**"ONLINE FOLK SONG COMPETITION" under the Banner 'AZADI KA AMRIT MAHOTSAV'  
Theme: 'Unity through Folk Song' Date: 24th May 2023**

- The competition shall be open to Local Folk Artistes, Cultural Troupes & Institutions in the State of Nagaland.
- The participating group shall present 1 (One) Folk Song in full Traditional Attires.
- The performance should be of minimum 2 (Two) minutes and maximum 3 (Three) Minutes duration.
- The song is to be presented in respective local dialect.
- The Participants shall not be less than 15 (Fifteen) persons and not more than 30 (Thirty) persons.
- The participating groups are required to send/submit Recorded Video (in digital format/DVD/Pen-drive) along with the Lyrics (PDF Format) of the song in English to Email ID: artandculture2023competition@gmail.com or to the Directorate office in person on 24th May 2023.  
**Note :** No Audio recording shall be accepted.
- There shall be no entry fee for participation in the competition.
- The panel of judges shall be appointed to judge the competition and the decision of the judges shall be final and binding.
- The competition will be judged on the basis of the following:  
i) Voice, Intonation & Rhythm                      ii) Harmony    iii) Expression  
iv) Music arrangement                                  v) Traditional Attires/Costumes                      vi) Overall impact.
- The winning participants/groups will be given prizes and certificates.  
1st Prize - Rs. 30,000/-                                  2nd Prize - Rs. 15,000/-                                  3rd Prize - Rs. 12,000/-
- The participating folk singers should be from any age group of 10 years & above
- The Entry Form can be downloaded from the Department Website www.artandculture.nagaland.gov.in and duly filled in form (in PDF format) can submitted to Directorate of Art and Culture office through Email ID: artandculture2023competition@gmail.com or WhatsApp No. 8798030180 on or before 15th May 2023.
- The Department will announce the competition result in the local Newspapers.
- The Department reserves the right to modify, change and to interpret the contents of the above rules.

**(ADELA MOA)  
Director,  
Art and Culture,  
Nagaland; Kohima**

**MULUNGEN O**

*"Tejungnuba takumji Ka-a kumdaktsütsü, shibai  
Tzü ainer pa dak-a Tzü indaktsütsü. A/Shin-11:25."*



**ASOBA  
07-01-1942**

**TASÜBA  
19-04-2023**

**LUINKALAJAMIRUNGMA**

Onoki teti meima alila **OJALA LUINKALA JAMIR**, iba lima nungi pilaa aoba mapang ozü Asüku mulung zürep nung alidang, Ungma Yimten Yimlang, Yimpang Yimsüser, Ungma Baptist Arogo tenzükertem, CYE, Evangelistic committee, Kiyongtsürtem, Kinungertem aser onok dang aria bilemertem, shinokisa ozü mulung suneptsüogo, nenok ajak dang kangasa pelaba lemsateper.

Onoki kecha lepa agütsütsü maka saka iba Tsüngrem O ajanga nenok moajangma.

*-Temeim Chirnur, Semchirtem aser Anükapang.*

**Longkong Metsübu Kidong  
Mokokchung  
TENÜNGSANG**

Longkong Metsübu Kidong züngsem tajung aseme Sorkar mapa tenzükba wadang nung temaba jenjang ajangzükba asoshi Longkong Metsübu Kidong Mokokchung-i tenüngsang tulu agütsür. Tarutsü nunga nenok shisa tajung aser nendaka inyakba ajanga asen lima ajangzüksü asoshi anema aliba arishi talang moajang ta sarasademtsür.

- Mr. S. Senka Jamir, Deputy Director nungi Joint Director, under Nagaland Horticulture Department.
- Mrs. Yashijungla, Section Officer nungi under Secretary, under Nagaland Civil Secretariat.
- Mr. Limanungsang Jamir, Section Officer under Secretary, under Nagaland Civil Secretariat.

**Sd/-  
Imnüksüngba Jamir  
Convenor LMKM**

**Sd/-  
Mapuyanger Jamir  
Secretary LMKM**

**Ganja shibelenba atema Singapore nung nisung ka alenset**

**Singapore, Rongchii/April 28 (Agencies):** 2018 küm ganja (cannabis) seret ka (2.2 pounds) dak tali shibelenba nung aibelenba aliba ngutetba sülen Singapore nung arishi küm 46 tain Tangaraju Suppiah lisü agi alenseta südaktsü, shiba atema par kinunger aser activist temi tatem tashi temerenshi ajemtsü mepishia liasü.

Par kinungeri ashiba agi, parnok nem Tangaraju asüba indang kulizüing kaket agütsü, ta anti-death penalty campaigner Kirsten Han-i Twitter nung zülutsü.

Singapore prison services indang odongtar kati, iba temerenshi ya asetkong anüdoklen Changi pricon nung agütsü, ta osangbener dang shia liasü.

Cannabis seret ka dak tema shibelenba merangba nung ajungshiba mesüra yariba atema Tangaraju Suppiah nem tasüba temerenshi agütsütsü 2018 küm obendang agüja liasü. Singapore-i temesepba mozü shibelenba meranger ka den pai phone number ka amshia osangtsüsang agitepba

obendangeri ngutet.

Tangaraju nem legal counsel peria magütsü aser police temi asüngdangyaba mapang Tamil nunger oshi meyiptsü teyari magidaktsü, ta par kinunger aser activist temi ajia liasü.

Human Rights Watch (HRW) Deputy Asia Director Phil Robertson-ia iba temerenshi ya aitsü aser Tangaraju anema kuli ngutetba ya tejangja masü, kechiaser pai kodanga iba temesepba mozü nung mokongshi aser lawyer medeni police temi asüngdangya asü aser Tamil nunger oshi meyiptsür pai meshiba ama magütsü, ta ashi.

Amnesty International ajanga iba temerenshi ya ozüing alema lir ta ashi aser iba ken o jembiba yagi international law aser standards nung aibelener, ta shia liasü.

Singapore nung taoba küm nisung 11 nem tasüba temerenshi agütsüba sülen tang mezüingbuba alitsü.

Temesepba mozü amshiba ken o ajak nung tasüba temerenshi agütsüba anema Singapore nung alir temi ola

adoker aser taoba küm Nagaenthran Dharmalingam alenseta südaktsüba sülen iba yimti nung longkak aita liasü.

Singapore-i temesepba mozü shibelenba anema ajang-ajanga nokdaktsü ta ashir.

British business tycoon Richard Branson-i Tangaraju tenüng nung temepeshiba ka agütsüba nung telangzüba agütsüdag, pa indang ken o nung tamang makatsüsa kecha mali aser cannabis seret ka yagi temesepba mozü achir nisung 150 hopta ka peritsü liasü, ta sorkari shia liasü.

"Onoki sentong yangluba ama inyaker, aser Singapore nübur asoshi tajungtiba lenmang bushia inyaktsü," ta Ministry of Home Affairs ajanga sangdong ka nung ashi.

Tasüba temerenshi amshiba linük temi iba temerenshi ya mapa tamajungtiba inyakba nung ang amshitsüla, ta United Nations-i ashir aser yangji temesepba mozü maden. Mongulbarnü UN-ia Singapore dang Tangaraju nem tasüba temerenshi magütsütsü ajungshia liasü.



April 28, 2023 : Venezuela den arütsüa alidak Pacaraima, Brazil nung Venezuelan migrant ka asükba agi temang lemdaktsütsü meranga sü ka abena aliba noksa nung angur. Venezuela nung yimtenren aser rongsenketzüng tsütsü timtem ajurua lir. 2015 küm nungi nisung million 7 shi linük yutsür migrant aser refugee ama ao aser ano million ka danga linüktem nung asylum bushir.

**Sudan nung ceasefire  
atsülangaka khatepba manener**

**Khartoum, Rongchii/April 28 (Agencies):** Sudan nung telok nungi teshimtet telemsa adoka aliba mitkartem tsüingta ceasefire tembangtsü lia ano anogo asem atsülangtsü molungtepa liasü.

Kidanger linük aser US, UK aser UN densema bendanger temi meranga jembiba sülen anogo ghonda 72 atsülangtsü ya molungtepa liasü.

Ajisüaka linük yimtiba Khartoum nung maneni kanga sashia khatepba osang lir.

Taoba mapang rara anena ataba ajanga nisung meyerijang aika jena aotsü merang aser linük ter dak temai pei senso anizüker aotsü meranga liasü.

Army aser paramilitary telok ka tsüingta hopta ana junga raraba nung nisung noklang aika süogo.

Ceasefire ya Brehostibar ayatirm nung tembangtsü liasü.

Brehostibar nikongdang Sudan mitkar temi ceasefire atsülangtsü molung aser parnok den rarar paramilitary Rapid Support Forces (RSF)-ia ghonda ishika lir parnok sülen anidaka liasü.

South Sudan-i par linük nung yimjung ken o jembitsü

ayongzük aser army temi par telok nungi teshimtet nisungtem jembishinütsü asoshi yoktsü molung.

Washington-i yimjung atsülangtsü meranga inyaker aser iba yongji azüdokshi ajemogo, ta US Secretary of State, Antony Blinken-i shia liasü.

Ajisüaka mapang tatsüka lir White House odongtar Karine Jean-Pierre-ibo mashi mapang tensa mejungi akumtsü akok ta shia liasü.

Hokulbarnü Turkish military plane ka par nüburtem anizüker aotsü atema Khartoum tezülen airport ka nung anendang injang khalokja liasü. Iba lendong nung shinga meyeru aser army temi RSF dak tai tongloksüba parnok magizük.

RSF aser tenük kuli alirtemi ashiba agi, army temi Khartoum nung parnok alidak injang aser bomb khaloktsür.

Taoba civilian sorkar nung foreign minister inyaka alila Maryam al-Sadiq al-Mahdi-i Khartoum nung lar kidang nungi BBC dang ashiba agi, ceasefire liaka civilian tem tetsübo nung alir.

*(Maneni tapak 8 nung...)*



## WIF tir Brij Bhushan Sharan Singh anema FIR benoktsü: Delhi Police



**New Delhi, Rongchii/April 28 (Agencies):** Wrestling Federation of India (WFI) tir Brij Bhushan Sharan Singh-i tim masüba mapa inyak ta wrestler temi ashishiba dak sendakba nung FIR ka benoktsü, ta Hokulbarnü Delhi Police-i Supreme Court dang metetdaksü.

Tim masüba mapa inyak ta India nung wrestler tajungtemi tai tonglokja alisang Brij Bhushan Sharan Singh-i pa tai mali ta sayutsü asoshi tashi ajak agi nokdaksü, ta Brehostibarnü metetdakja liasü.

BJP MP ajanga video message ka nung pa dak tai tonglokja aliba metetshie raratsü tashi ali tashi tamakok magizüktsü, ta sayua liasü.

"Medemertem, ni kü takum meyiba reprangshiba anogo, ni kechi ajangzük mesüra akoksa, ni raratsü tashi mali ta metetba anogo, ni teimla mali ta bilemba anogo, ni yamaji alitsü mejangratsü. Iba ama takum ka alitsü melena, tasübai menepba tajungba asütsü ta ni bilemstü," ta pai ashi.

Ita asem tashi ataba nung tezü tanger maneni longkak aittsü asoshi jashia aliba wrestler tem April 23 nü Jantar Mantar-i meyiba shilang. Anogo pongu

tashi wrestler tem yangji longkak aita arur.

WFI tir Brij Bhushan Sharan Singh anema longkak maneni aittsü asoshi yimtongi aruba ya ajanga wrestler dak yimya tajung agi anünga aliba sayur, ta Indian Olympic Association (IOA) tir PT Usha-i Brehostibarnü shia liasü.

Brehostibarnü IOA indang executive committee meeting ka sülen osangbener den jembidang, "Tim masüba yimya amshiba mesüra mapa inyakba atema IOA committee ka lir aser athletes commission lir ta onoki angateta lir. Yimtongi maneni arua longkak aittsü melena parnok ya onok dangi arutsüla asü, saka parnok IOA dangi maru," ta Usha-i ashi.

IOA ajanga iba ken o bushisüngdangba maparen ano merenem aser sorkari tentetba oversight panel ajanga bushitetba ya yimjak nung ano mesangdong.

Yamaji lia India nunger saisapong temi Hokulbarnü longkak aita aliba wrestler tem bukuma liasü aser itemji Olympic gold medallist Neeraj Chopra aser Abhinav Bindra nati anir lir.

Chopra-i tweet ka nung, "Asen athletes tem yimtongi

nung ochi obendang khanga angudang ni temolung shiranger. Asen tamaren linük tenüng nung shilem agitsü asoshi parnoki mapa meranga inyak aser asenok tejak tentetdaksü. Linük ka astünung, asayar süang tesü, nisung ajak temeden wazüka ayutsü asen mapa lir. Tang kechi ataloker, ya kodanga mataloktsüla," ta zülutsü.

"Ibai tekumdangtsü ken o ka lir, aser ochishia inyaktsüla. Ochi obendang agütsütsü asoshi tim ketdangtsüri tekeraba nung mera agitsüla."

Bindra-ia Brehostibarnü tweet ka nung, "Athletes ka ama asenoki international sapang nung asen linük tenüng nung tokteptsü asoshi anogoshi meranga training agir. Indian wrestling administration nung merenshia amshiba dak sendakba nung yimtongi longkak aittsü tim ta asen athletes temi bushitetba ngua khuret abener," ta zülutsü.

Ano tsüngteper Nikhat Zareen, tennis asayar Sania Mirza, hockey asayar Rani Rampal, taoba mapang cricket asayar tejangja Virender Sehwag, Harbhajan Singh, Irfan Pathan, Madan Lal aser Navjot Singh Sidhu nungeria wrestler tem bukuma nokdaker.

## Sudan nung ceasefire atsülangaka... (Tapak 7 nungi...)

Telok ana tsüngta mapang tatsüka atema rara anena atatsü züngzüktepaka kecha mesüteter. Aeroplane tem amshia anüngdang aser aonung bomb pokloksür," ta lai BBC Radio Four's World Tonight programme dang ashi.

Western Darfur region aser danga province tem nunga raraba osang lir.

Iba rara nung nisung 512 takum samatsüogo aser 4,200 jungnüa yirutsü, ajisüka asür ya timba alitsü akok.

Tashidak balala poktetba aser services peria maliba ajanga asür timba alitsü, ta World Health Organization ajanga ashir.

Rara adoka aliba tesem nung mozüki timba shibanga lir aser Khartoum nung mozüki shilem 60 dak tema nung mapa meinyaker, ta health ketdangtsü temi ashir.

Army temi sangdong ka nung Sudan indang region timba par küboki aitogo saka linük yimtiba nung tesem kar nung tensa kanga tepenja lir, ta shia liasü.

UK densema bendang linük temi pei senso dang akok tashi tekeraba nung iba linük nungi ainshitsü ajungshir.

Brehostibar nikongdang jembidang Jean-Pierre-i America nung dang ghonda 24 tsüngta ainshitsü ajungshi.

Bendanger tem anizüker aoba maparen maneni inyaker saka aika Sudan nungi moteti lir. Aika anizüker aotsü atema amshiba airstrip tonga moteter.

Yangji aliba civilian tem linük yimtiba nungi maneni jena aor, kong chiyongtsü, tzu aser totzü tebilemstü lir.

Darfur nung raraba nungi jena aor Sudan nung ya arütsü alema orr Koufroun

yimtsüng nung Chad nung dang timba kumogo, ta UN ajanga ashir.

Sudan nung tensa tamajungba kumra Chad-i refugee tem aniokba memesütetsü, ta ashir.

Army aser RSF tsüngta tashi agi raktepa April 15 nü rara ya tenzük.

Linük civilian nem yimsü sädaksü aser talisa RSF züngsem 100,000 army nung anioktsü asoshi mapang latetba nung army commander Gen Abdel Fattah al-Burhan aser RSF tekolakba Gen Mohamed Hamdan Dagalo na obang mapur.

Telok anaprongi Sudan nung par tashi samatsü tsübor, kechiaser küm 20 shi jakdang Darfur nung raradang mapang tamajung inyakba atema International Criminal Court dangi aotsü nisung aika lir.

## Asian Cup tarubaküm Jan-Feb ita Qatar nung asayatsü

**Rongchii/April 28, 2023 (Agencies):** Taruba Asian Cup 2024 küm Qatar nung January 12 nungi February 10 nü tashi asayatsü, ta Asian Football Confederation (AFC)-i metetdaksüogo.

Iba asayamung ya China nung asayatsü asoshi 2019 küm temelaba agütsü ajisüka linük nung zero-COVID policy benoka aliba ajanga iba asayamung ayongzüka masayatsü atema taküm telemtetba agi.

Qatar kong taoba küm World Cup ayongzüka asayaogo, iba linük nem asayamung ayongzüka asayatsü atema temeden agütsüogo. South Korea aser Indonesia natia iba asayamung

ayongzüka asayatsü tejangraba aliba lemsatepa liasü.

Gulf nung lemluwa kanga tatsüka asüba ajanga team 24 asayatsü aliba asayamung ya 2023 küm teyongtsülen asayatsü aliba 2024-i belener ogo.

Qatar nung 1988 aser 2011 küm Asian Cup ayongzüka asayaogo aser parnoki United Arab Emirates nung 2019 küm iba asayamung tesüsabuba koka lir.

AFC-i ashiba agi, iba asayamung ya stadiums ti nung asayatsü aser item rongnung trokbo WC mapang amshio.

Asian Cup ya Africa Cup of Nations finals den külemi asayatsü koba Ivory Coast nung January 13 nungi February 11 tashi asayatsü.

## Tennis nung line judges melen technology amshitsü: ATP



**Rongchii/April 28, 2023 (Agencies):** 2025 küm nungi tenzük ATP Tour nung nisungi line judges inyakba melena electronic calling system ka amshitsü.

ATP ya tebur tennis asaya ketdangtsüba tentet ka lir aser iba mera yagi asaya nung shidak aser kasa bendangtsü, ta ashi.

Australian Open aser US Open densema asayamung tongtipang kar nungbo line judges atema nisung amshiba melenogo.

"Asen saisapong nung ibai alizüng tasen ka alitsü aser ibai tapi agi inyakba maparen ka masü," ta ATP chairman Andrea Gaudenzi-i ashi.

"Tennis asoshi akhi yimyatem ya tiyongtsü lir aser line judges temi iba asaya nung tongtipang shilem agia aru.

Asenoki technology tasen den lirumedema aotsü nungdaker," ta pai ashi.

COVID-19 pandemic mapang asayamung nung nisung inyaksangshi ajemdaksütsü merangba mapang nungi electronic calling system ya bulua amshia aru.

Iba ya ATP Tours ajunga nung amshitsü, saka Grand Slam tournament pezü nungbo par sasa telemtetba agir.

Ai (grass) nung asayaba Wimbledon aser ajong (clay-court) nung asayaba French Open nungi nisung agientsü memolungi arur.

Wimbledon nung asayar temi Hawk-Eye system amshia telemtetba balala reprangshitsü melar, saka French Open nungbo tang tashi technology teyari benoktsü memolunger.

## Washington IPL nung tanungba asayatem nung masayatetsü

**Rongchii/April 28, 2023 (Agencies):** Sunrisers Hyderabad-i Brehostibarnü sangdong ka ajanga all-rounder Washington Sundar hamstring yiruba sülen IPL 2023 nung tanungba asayatem nung shilem magitetsü ta metetdaksüogo.

"Washington Sundar hamstring yiruba sülen IPL 2023 nung masayatetsüsa kumogo. Pa takaratiba nung taneptsü angutsü imlaja atar," ta SRH-i tweet asü.

Taküm asaya tenet nung arishi küm 23 tain spin-bowling

all-rounder yagi SRH nungi asayaba mapang wicket asem agi aser run 60 yanglur liasü. Pai taküm out mesüi run 24 yanglur aliba ya ajak dang timtiba liasü.

Taoba IPL nunga Tamil Nadu nungi asayar ya pa ball aonba teka yirua tetsükdaksü tulu adoka liasü.

SRH pur taküm junga masayateti arudar. Parnoki asaya tenet nungi asaya ana dang koka lir aser team 10 asayaba asayamung nung ya parnok tang jenjang 9buba nung lir.

**BILEMDANGANG**

"Ajungmesor lir, saka naia inyaktsüla."